

Katerisimaartarnernut aamma ininut kikkunnit tamanit iserfigineqarsinnaasunut killilersuigallarnerit pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, §§ 6 aamma 12 b, aamma § 29, imm. 2 malillugit aalajangersarneqarput:

Atuuffiata killilerneqarnera

§ 1. Nalunaarummi §§ 4 aamma 5 katersuunnernut naalakkersuinikkut allatulluunniit isummernissamik siunertalinnut atuutinnngillat.

Imm. 2. Nalunaarummi § 6 napparsimavinnut, nakorsiartarfinnut, nakorsiartarfinnut namminersortunut imaluunniit niuertarfinnut peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinnngilaq.

Imm. 3. Nalunaarut ulluunerani neqeroorutitut namminersortunut pisortaniillu pigineqartunut, atuarfinnut, ilinniarfeqarfinnut il.il. atuutinnngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

Imm. 4. Nalunaarut eqqartuussisut pissaanermik atortitsinerannut atuutinnngilaq.

Imm. 5. Nunatta Nakorsaaneqarfia aalajangersakkamiit immikkut akuersisinnaavoq, tamanna pisariaqarpat peqqissutsikkullu illersorneqarsinnaasutut nalilerneqarpat.

§ 2. Nunatsinnut tikittut Covid-19-imut tamakkiisumik akiuussutissamik kapitinnermik uppersaasiisinaasut § 4-mi imaluunniit § 5-mi ilaatinneqanngillat.

Imm. 2. Inuk Covid-19-imut tamakkiisumik akiuussuserneqarsimasutut isigineqassaaq akiuussuserneqarsimanerup ingerlarnngata naammassisimaneranik ullut 14-nit qaangiuppata, tamanna inuup uppersarsinnaappagu. Nunatta Nakorsaaneqarfiata akiuussuserneqarsimanermut uppersaatit sorliit akuerisaanersut aalajangissavai.

Pingaartumik inunnut Covid-19-imik siusinnerusuklut tunillatsinnikunut

§ 3. Nunatsinnut angalasut siusinnerusuklut Covid-19-imik tunillatsinnikuusimasut tikinnerminnilu PCR atorlugu misissortereernermikkut Covid-19-imik tunillatsissimanerminnillu minnerpaamik ulluni 14-ini annerpaamik sapaatit akunnerini 12-inik pisoqaassusilinnik uppersaasiisinaasut, inatsisitigut naammassillutik akiuussuserneqareersimasutut isigineqassapput.

Imm. 2. Inunnut siusinnerusukkut Covid-19-imik tunillatsinnikuusimasunut tikinnerminnilu PCR atorlugu misissorteerinnermikkut Covid-19-imik tunillatsissimanerminnillu minnerpaamik ulluni 14-ini annerpaamik sapaatit akunnerini 12-inik pisoqaassusillinnik uppersaasinnaasunut, Covid-19-imik nappaateqannginnermut uppersaanermik piumasaqaat atuutinngilaq.

Imm. 3. Uppersaat suna uppersaatitut akuerisatut atorpeqassanersoq Nunatta Nakorsaaneqarfiata aalajangersinnaavaa.

Aaqqissuussinernik il.il., peqataaniarnermi nunanit allanit angalaqqaarluni peqataaffigineqarsinnaasunik inerteqquteqarneq

§ 4. Illup iluani silamilu aaqqissuussanik, nalliuttorsiornermik, sammisaqartitsinerinik assigisaannilluunniit ingerlataqarnerit, nalinginnaasumik aaqqissuussamut peqataaniarnermi nunanit allanit angalaqqaarluni peqataaffigineqarsinnaasut taamatulluunniit naatsorsuuteqarfigineqartut inerteqqutaapput, taamaattorli imm. 2 takuuk.

Imm. 2. Aaqqissuussani, nalliuttorsiornermi, sammisaqartitsineri assigisaannilluunniit peqataanissamut nalunaarnissamik piumasaqaatilinni inuit nunanit allaneersut imaluunniit naalagaaffeqatigiinnerup ilaneersut tikinnermiit ulluni 14-ini siullerni aaqqissuussamut, nalliuttorsiornermut, sammisaqartitsinerimut assigisaannilluunniit peqataasussatut nalunaarsorsinnaannginnissaat aaqqissuussisup qulakkiissavaa, taamaattorli imm. 2 takujuk. Imm. 1 malinneqarpat, taava aaqqissuussaq il.il ingerlanneqarsinnaavoq.

Imm. 3. Pikkorissartitsinerit, isumasioqatigiinnerit assigisaallu imm. 2-mi ilaapput.

Imm. 4. Namminerisamik aaqqissuussat, soorlu assersuutigalugu kuisitsinerit, inuuissiornerit, apersortinnerit, soraarummeertoqarneranut atatillugu nalliuttorsiornerit, katinnerit ilisinerillu imm. 1-imi aammalu 2-mi ilaangillat.

Aaqqissuussinernut il.il kommunini allani peqataanissamut inerteqqut

§ 5. Illup iluani imaluunniit silami aaqqissuussat, nalliuttorsiornerit, sammisasaqartitsinerit assigisaannilluunniit kommunini allani inuit peqataanissaat inerteqqutaapput, aaqqissuussineq il.il. sioqqullugu ulluni 30-ni illoqarfimmi, nunaqarfimmi imaluunniit piffimmi aaqqissuussamik ingerlatsiffusussami Covid-19-imik tunillatsittoqarsimappat.

Imm. 2. Taamatuttaaq pikkorissartitsinerit, isumasioqatigiinnerit assigisaallu imm. 1-imi ilaapput.

Imm. 3. Namminerisamik aaqqissuussinerit, soorlu kuisitsinerit, inuuissiornerit, apersortinnerit aamma soraarummeertoqarneranut atatillugu nalliuttorsiornerit, katinnerit ilisinerillu imm. 1-imi ilaangillat.

Imm. 4. Nunatta Nakorsaaneqarfia imm, 1-imiit 5 ilanngullugu immikkut akuersissuteqarsinnaavoq, pissutsinik piviusunik tamanna tunngavilersorneqarsinnaappat.

Ininut kikkunnilluunniit iserfigineqarsinnaasunut piumasaqaatit

§ 6. Inuit aamma inatsisit naapertorlugit ingerlatsiviusut, tassunga ilanngullugu pisortat oqartussaaffii aamma suliffeqarfii, ininik kikkunnit tamanit iserfigineqarsinnaasunik pigisallit piumasaqaatinik

makkuninnga naammassinnissimassapput:

- 1) Inimi ininiluunniit tamanit iserfigineqarsinnaasuni eqqiliusaarnissaq ileqqorissaarnissarlu pillugit Nunatta Nakorsaaneqarfianiit paasissutissanik nivinngaasoqassaaq.
- 2) Sulisut tamarmik Nakorsaaneqarfiup eqqiluisaaqqissaarnissamik ileqqorissaarnissamillu innersuussutaanik malinninnissaat qulakkeerneqassaaq.
- 3) Pisisartunut pulaartunullu ajornanngippat imermik qaqorsaammillu imaluunniit assammut spritimik peqassaaq.
- 4) Nerisassanik poortorneqarsimanngitsunik tuniniaanermi sulisut aaqqateqassapput.

§ 7. Inuussutissarsiummik ingerlatalik politiit naliliinerat malillugu § 6-imik unioqqutitsisimappat, inuussutissarsiummillu ingerlatalik § 6-imik malinninnissaa ilimagineqanngippat, inuussutissarsiummik ingerlatalik inip piffissami aalajangersimasumi tamanut matoqqatinnissaanik politiinit peqquneqarsinnaavoq.

Iliuseqarnerit

§ 8. §§ 4-6-imik unioqqutitsisoq imaluunniit § 7 malillugu peqqussummik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttuleringeq pillugu inatsiseqartitsinikkut akisussaatinneqarlutik pineqaatissinneqarsinnaapput.

Imm. 3. Akiliisitsissutit Nunap Karsianut tutsinneqassapput.

Atuutilersitsineq, atorunnaarsitsineq piffissarlu atuuffissaq

§ 9. Nalunaarut ullormi 3. september 2021 nal. 16:00 atuutilissaaq.

Namminersorlutik Oqartussat, ulloq 3. september 2021

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut